

RIU ta lansa proyecto pa proteha e conenchi endemico di Aruba

CU financiamento brinda door di RIU, e cadena hotelero ta lansa, hunto cu Aruba Conservation Foundation (ACF), un iniciativa pa conserva, proteha y restaura e poblacion di e conenchi di rabo di catuna di Aruba (cone). RIU Hotels & Resorts y Aruba Conservation Foundation (ACF), un organisacion independiente sin fin di lucro, ta colabora den forma significativa pa garantisar sobrevivencia di e conenchi di rabo di catuna, conoci localmente como coneu.

Aruba ta un isla chikito den Caribe cu ecosistemanan cu ta keda cambia y RIU a dicidi di contribui n'e proteccion, preservacion y restauracion di un especie endemico manera e conenchi "cottontail." E cadena hotelero ta agrega e proyecto di conservacion di biodiversidad aki na su proyecto di sosten na comunidad, avansando di e manera aki e obhetivo di su strategia di sostenibilidad "Proudly Committed".

E colaboracion aki ta enfoca e esfuersonan pa move den direccion di ecosistema sostenibel cu ta garantisar trato responsabel y etico di e coneu ademas di su sobrevivencia, poniendo prioridad riba bienestar di e animal. E meta tambe ta pa establece bon practica cu ta promove conservacion, proteccion y maneho corecto di fauna nativo.

E proyecto aki ta inclui varios aspecto dentro di e plan di conservacion pa e especie aki. Un di nan ta pa haci estudio pa haya e datonan exacto di e poblacion actual di e coneu y e calidad di su habitat.

Na mes momento lo haci trabounan pa restaura e habitat di e mamiferonan aki, replantando vegetacion nativo y reduciendo e impactonan negativo cu actualmente ta afecta e areanan protegi.



Ademas, lo lansa un programa pa captura y realoca e especienan domestico, manera cacho cu pushi, y herbivoor domestico, manera cabrito, pa evita cu nan ta afecta e poblacion di coneu di un manera negativo.

Pa por tene un registro profundo di e coneu, lo haci sondeonan periodicamente, evaluando y controlando su poblacion y pues garantisar su sobrevivencia. Tambe lo tene charlanan y tayernan educativo pa conscientisa e comunidad tocante su importancia y involucra esaki den conservacion di e coneu.

ACF ta un organisacion dedica na conservacion di e ecosistema natural rico y diverso di Aruba, door di promove practica sostenibel cu ta integra obhetivo ambiental, social, cultural y economico. E meta di RIU ta pa tin e impacto mas positivo posibel riba comunidad y p'e motibo aki tambe ta trahando for di aña 2019 cu e fundacion sin fin di lucro Stichting voor Verstandelijk Gehandicapten Aruba (SVGA), ofreciendo diferente sesion di rehabilitacion fisico pa mucha y adulto cu limitacion pa nan por desaroya nan habilidadnan motorico y cognitivo cu ta permiti nan mas autonomia.

Stimami. Sterilisami.

REGISTRA AWO

Y BENEFICIA DI NOS SUBSIDIO CU TA CUBRI TE CU 45% DI E COSTO DI STERILISACION DI BO MASCOTA Y UN MICROCHIP GRATIS!

PA MAS INFORMACION BISHITA: WWW.STIMAMISTERILISAMI.COM